



ԱՎԵՏԻՔ ԻՍԱՀԱԿՅԱՆ

ԷԶՄԻԱԾՆԻ ՊԱՏՄԱԿԱՆ ԴԵՐԸ

301 թվին Ապոստոլ Գրիգոր Պարթևի քարտեզներով հայոց Տրդատ թագավորն ընդունեց և հռչակեց քրիստոնեությունը իբրև պետական կրոն և բովանդակ հայ ժողովրդի հետ մկրտվեց: Այդ ժամանակ, 303 թվին հիմնվեց Էջմիածին տաճարը և կաթողիկոսությունը Արշակունիների մայրաքաղաք Վաղարշապատում:

Ապոստոլ Գրիգորը կոչվեց Հայաստան աշխարհի «Սուրբ Լուսավորիչ» և եղավ առաջին կաթողիկոսը, քահանայապետը, Եկեղեցու բարձրագույն իշխանը:

Էջմիածնի հիմնարկության պատմական փաստը հյուսված է հրաշքներով, առասպելներով (լեգենդա) և ժողովրդական ավանդություններով: Դեռ չորրորդ դարում ստեղծված ավանդության համաձայն, Լուսավորիչը իր տեախքի մեջ տեսնում է, որ Քրիստոս, Աստծու միակ Որդին, Միածինը, իջնում է երկնքից և նրան ցույց է տալիս այն վայրը, ուր պիտի կառուցվի տաճարը և լույսերի մեջ գծված տաճարի կաղապարը (մոդել):

Այդտեղից ծագում է տաճարի անունը՝ Էջմիածին, այսինքն՝ Միածինը իջավ:

Ժողովրդի ավանդությամբ, Քրիստոս նշեց շինել տաճարը այն վայրի վրա, ուր Նոյ Նա-

հապետը ջրհեղեղից հետո՝ Արարատ լեռից իջնելով շնորհակալության կոհ մատուցեց Աստծուն: Դարձյալ ժողովրդի ավանդությամբ, Տրդատ արքան, որ հսկա մարդ էր, իր ուսերին դրած բերեց Արարատ լեռից ահագին ժայռեր, որոնք կապմեցին տաճարի անսասան հիմքերը:

Հնության հնայքով օժված, հրաշքներով, ավանդություններով նվիրականացած Էջմիածինը դարձավ հայ ժողովրդի համար ազգային ամենաառաջին սրբավայրը: Հայ ժողովուրդը հավատաց նրա հրաշագործ պորությանը, երկնքից ուղարկված նրա էությանը: Եվ այսպիսով նա ներքնապես ամրացած՝ կարողացավ դիմանալ բախտի հարվածներին և հարատևեց դարեր ու դարեր:

Էջմիածինը կոչվեց «Կաթողիկե Եկեղեցի, Մայր Եկեղեցի, Մայր Աթոռ, Սուրբ Էջմիածին»:

Սակայն Էջմիածնի պատմական դերը, նրա գոյության իմաստն ու իրավունքը անհամեմատ ավելի հպորացավ և անհրաժեշտ դարձավ հայ ժողովրդի համար այն դժբախտ օրից, երբ մենք 14-րդ դարում կորցրինք մեր պետականությունը: Այդ ժամանակից Հայ Եկեղեցին փոխարինեց հայ պետությանը, նա դարձավ և կոչվեց հոգևոր իշխանություն, հոգևոր կառավարություն: Եկեղեցու պետը ուներ իր գահը, հրամաններ էր արձակում, կոնդակներ էր ուղարկում, բանադրում էր, սլատժում կրոնապանդներին, ազգուրացներին, անբարոյականներին: Հայ պետության անկումով՝ հայ ժողովուրդը մնաց ամբողջապես իսլամական ժողովուրդների ծովում, ենթարկված անընդհատ արշավանքների ավել-

* Հաճույքով և ուրախությամբ ենք հրատարակում իսկ նոր գրականության մեծ դասական Ավետիք Իսահակյանի՝ Մայր Աթոռի արխիվում պահպանված սույն տևտիպ հոդվածը Մայր Աթոռ Ս. Էջմիածնի պատմության դերի մասին՝ գրված 1955 թվականին Ամենայն Հայոց Կաթողիկոս Վազգեն Առաջինի ընտրության և օժման օրիկով:

լածություններին և կոտորածներին, բռնակալների հարստահարություններին և կրոնական մոլեռանդ հալածանքներին. միակ ուժը, գործությունը և պաշտպանությունը որ կար, որին ընդունում էին առավել կամ նվազ չափերով իսլամ պետությունները, դա Էջմիածինն էր, կաթողիկոսությունը: Նրա ձեռքումն էին կենտրոնացված ազգային ներքին գործերը, հոգեկան-կուլտուրական բովանդակ կյանքը՝ կրոն, լեզու, բազմաթիվ վանքերը, ուր կային դպրոցներ, ուր մշակվում էր գրականությունը: Դրանք ազգային գոյության վառարաններն էին, որոնք թշնամու աչքից վրիպած, արտաքինապես մոխրով ծածկված կրակի մեջ՝ մշտապես կայծում էին ժողովրդի ապստամբության բաղձանքները, լուսավոր ապագայի հավատն ու հույսերը:

Այս հզոր ազդակները դարերի իրենց ներսում գործով պաշտպանեցին հայ ժողովրդին մահմեդական դառնալուց, փրկեցին ձուլվելուց, իբրև ինքնուրույն ազգություն իսլամ ոչնչանալուց:

Հայ պետականության ժամանակ կաթողիկոսն ընտրվում էր հայ թագավորների, նախարարների և հոգևորականների կողմից, նրանցից հետո՝ կաթողիկոսն ընտրվում էր բովանդակ հայ ժողովրդի և հոգևորականների կողմից, որով նա կոչվում էր ամենայն հայոց կաթողիկոս, բոլոր հայերի կողմից ընտրված: Այս իմաստով՝ Հայ Եկեղեցին դեմոկրատիկ և ժողովրդական Եկեղեցու բնույթ ստացավ: Նրան հնազանդվում էր հայրենիքի և պատմության բերումով ամբողջ երկրագնդի վրա ցրված հայությունը իր կուլտուրական-հոգեկան-ազգային բոլոր խնդիրներում: Այսպիսով՝ ցրված հայությունը հանձին Էջմիածին իր ազգային միությունը ուներ, իր հեղինակավոր պետն ու առաջնորդը:

Ժողովուրդը նեղ օրերում դիմում էր իր Եկեղեցու պետին, ապաստանում էր նրան՝ իշխողների հալածանքներից և հարստահարություններից պաշտպանվելու համար. շատ և շատ անգամ կաթողիկոսի միջամտությունը, աղերսները և թանկ նվերները դադարեցրել են հալածանքները. կաթողիկոսները մեծ հարգ ունեին իշխողների մոտ, հաճախ խորհրդատու էին նրանց, հաշտության միջնորդներ էին իրար հետ կռվող իշխողների միջև: Նաղիր պարսից շահի թագադրման հանդեսին մեծ ջբով ներկա էր կաթողիկոսը, որը օրհնեց շահի թուրը և կապեց նրա մեջքին:

Սուլթաններն ու շահերը Հայ Եկեղեցու պետի հետ էին բանակցում հայերի վերաբերյալ ընդհանուր գործերի վկայմամբ: Հայ բաղաձայնությունն էր վերում նա: Պարսկաստանն ու Թուրքիան ձգտում էին իրենց գրաված տերիտորիայի մեջ ունենալ Էջմիա-

ծինը՝ ավելի մեծ ազդեցություն ձեռք բերելու համար հայ ժողովրդի վրա:

Երբ ռուսական ցարերը սկսեցին իջնել հարավ և կռիվ էին մղում թուրքերի և պարսիկների դեմ, անմիջապես ուշք դարձրին Էջմիածնի վրա, որ տակավին՝ գտնվում էր պարսկական իշխանության տակ. Ռուսաստանում ցրված հայերի անունից միջամտեցին Էջմիածնի ներքին գործերի մեջ, դիվանագիտական ճանապարհներով հաջողեցան իրենց թեկնածուն դնել կաթողիկոսական գահի վրա: Էջմիածնի համակրանքը, որեմն, բովանդակ հայության համակրանքը, դարձավ Ռուսաստանի կողմը, և, իհարկե, պակաս չէին հայերին ապստամբելու ցարական խոստումները: Եվ նույնիսկ Ներսես կաթողիկոսը հայ կամավորների գլուխն անցած, ռուս բանակի մեջ, կռվում էր Պարսկաստանի դեմ: Եվ առհասարակ կաթողիկոսությունը միշտ էլ նպաստել է հայ սպատագրական շարժումներին թե՛ միջին դարերում և թե՛ նոր դարերում, օրինակ՝ 18-րդ դարում Սյունյաց Դավիթ Բեկի ապստամբությանը և ապստամբության պայքարին պարսիկ պետության դեմ: Այնքան քաղաքական կշիռ ուներ Էջմիածինը, որ ռոս-պարսկական առաջին պատերազմին, 1804 թվին կռվող կողմերը չեզոք գոտի ճանաչեցին Էջմիածնի տաճարը և նրա շուրջը:

Հայությունը, որ որ գտնվելիս լինել, սրբուով և հոգով կապված էր Էջմիածնի հետ, օտարության մեջ նրա կարոտն էր քաշում: 1605 թվին պարսից Շահ-Աբաս արքան ավերելով Արարատյան նահանգը՝ բազմահազար հայեր գաղթեցրեց Պարսկաստան առևտուրը և արհեստները իր պետության մեջ վարձացնելու նպատակով. Սպահանի մոտ Նոր քաղաք (Նոր Ջուղա) շինեց նրանց համար՝ տալով զանազան արտոնություններ, սակայն նրանք փարթամության մեջ առանց Էջմիածնի իրենց դժբախտ էին զգում: Շահը մտադրվեց քանդել Էջմիածինը և նրա քարն ու հողը բերելով նոր Էջմիածին կառուցել Սպահանում, բայց հայերի թախանձանքով հրաժարվեց այդ չար մտքից և միայն 15 քար տաճարից տեղափոխեց Սպահան, որ նոր Եկեղեցու պատերի մեջ դրին, որոնց առջև նոր ջուղացի հայերը աղոթում, ուխտի էին գալիս, սփոփվում էին իրենց կարոտից ու վրդ-սից:

Ժողովուրդների պատմության մեջ կրոնական հաստատության մի այսպիսի նշանակություն ունենալը հազվագյուտ երևույթ է, սակայն միանգամայն հասկանալի:

Օտար, դաժան պետությունների քմահաճույքներին ենթարկված հայ ժողովրդի համար Էջմիածինը՝ Եկեղեցիների մայրը, հայրապետական Աթոռը, այս ծանր ու տանջա-

լից դարերի ընթացքում, միակ ազգային հաստատությունն էր, որ տակավին հարատևում էր մնալ հայության ձեռքում: Նա ազգային գոյության խարխիսն էր, ազգային միության սիմվոլը, հայ ժողովրդի պսակված նայրենասիրական պագսմունքը ելք էր գտնում նրա մեջ: Կրոն և ազգություն սինոնիմներ էին դառել: Ստրկացած ժողովուրդը իր մարդկային իրավունքները, հույսերը, երազանքները մարմնացրել էր նրա մեջ:

Նրա համար հայերը բոլոր սրտով գուրգուրում էին նրան, նախանձախնդիր էին նրա գոյության և փառքին: Հեռավոր տեղերից ուխտ էին գալիս, նրան հարուստ նվերներ էին ուղարկում, գումարներ և ինչքեր էին կտակում: Նրա տոնը ազգային ամենափառավոր տոնն էր ամենուրեք, ուր որ հայ կար: Հին և նոր բանաստեղծները, գուսաններն ու աշուկները բազմաթիվ երգեր, գովքեր են նվիրել նրան: Բոլոր հանդեսներում և խնջույքներում առաջին բաժակը Էջմիածնի համար էին բարձրացնում և ոտքի վրա երգում էին հինավուրց երգերը նրան ձոնված:

— Էջմիածինը Հորից է (Աստծուց, Աստծու կողմից)

Եվ փառքի լույսը նրա հետ է:

— Միշտ անշարժ պահիր

Աթոռն հայկապնյա (հայոց ազգի):

Հայերը Էջմիածնի անունով էին երգում, և այդ երգումը հավասար էր Աստծու անունով երգումին:

Եվ վերջապես, երբ Էջմիածնին վտանգ էր սպառնում՝ հայերը ինչքան էլ որ ընկճված լինեին, պենքով կանգնում էին նրան պաշտպան, ինչպես եղավ, օրինակի համար, 1903 թվին, երբ ցարական կառավարությունը գրավեց եկեղեցու կալվածքները, ժողովուրդը սենքի դիմեց, արյուն թափվեց երկու կողմից, և կառավարությունը ստիպված վիջեց և վերադարձրեց կալվածքները՝ խաղաղեցնելու համար ըմբոստացած ժողովրդին:

Հայ ժողովուրդը բոլոր դարերում միշտ էլ, անընդհատ, իր ազգային գոյության համար, նրա պրինցիպների՝ պետության, հողի, լեզվի, կրոնի, կուլտուրայի պահպանության համար կռիվ է մղել, և որովհետև պետությունը

կորցնելուց հետո նա ազգային գոյության պրինցիպները ամփոփել էր Եկեղեցու մեջ, ուստի՝ Եկեղեցու պաշտպանության համար մղված կռիվը նա համարել է ազգային գոյության պաշտպանության կռիվ:

Գրությունս լրացնելու համար մի-երկու խոսք էլ Էջմիածնի կատարած գրական-կերթական դերի մասին: Շատ մեծ է և անգնահատելի նրա դերը այդ բնագավառում: Առաջին տպարանը հայ հողի վրա իր թղթերի գործարանով միասին բացվեց Էջմիածնում 18-րդ դարում: Շատ կրոնական, պատմական, գիտական, քաղաքական գրքեր լույս տեսան այդ տպարանից: Էջմիածինը ունեցավ իր ամսագիրը, որ տևեց երկար տարիներ: Ունեցավ իր հոգևոր դպրոցը և ապա Գևորգյան ձեռնարանը, որոնք մատակարարեցին ժողովրդին ընտիր ուսուցիչներ, եկեղեցականներ, գրողներ և գործիչներ: Օրինակի համար, մեր նոր գրականության հիմնադիրը՝ Ն. Աբովյանը հոգևոր դպրոցի ուսումնավարտ էր: Էջմիածնի նշանավոր գործերից մեկը, որին հավիտյան շնորհակալ պիտի լինենք, այն էր, որ նա հավաքեց և պահեց իր ամուր պատերի մեջ, փրկելով վերջնական կորստից, մեր դարերի հոգեկան զանձը—10,000 հին ձեռագրեր՝ մագաղաթյա ու թղթյա, որոնք տեղափոխված են Երևան և պահվում են աշխարհին հայտնի հայ պետական Մատենադարանում:

Մեր պետության անկումից հետո՝ Էջմիածնի պատմությունը մեր վեց դարերի հայոց ժողովրդի պատմությունն է, անբաժան մեկը մյուսից:

Էջմիածինը, իբրև հոգևոր իջխանություն, նկատի առնելով խավար ու բռնակալ դարերի հանգամանքները և կարեւորությունները, թերևս իր կարողացածից ավելի պատվով կատարեց իր ազգապաշտպան դերը մինչև Սովետական Հայաստանի ստեղծումը: Հոկտեմբերյան սոցիալիստական մեծ ռևոլյուցիայի հաղթանակով հայ ժողովուրդը վերստին ձեռք բերեց իր կորցրած պետականությունը, տեր դարձավ իր հողին, իրավունքներին և ճակատագրին, և իր կուլտուրական-տնտեսական բոլոր ֆունկցիաները մտան նորմալ պարզացման ուղիների մեջ:

